

115 年全國語文競賽臺灣原住民族語言朗讀文章 【建和卑南語】 高中學生組 編號 2 號

nanta 'amiyan i Kasavakan

kana 'a'ami'ami diya, nu pacepa ta data 'amiyan i Kasavakan mu, nu pulaludus na 'ami tu lrehiyan na Pinuyumayan mu, mau na mangayangayaw di mau na mangayaw tu kinakapadangal.

iniyam na Kasavakan nu mucalun mu, kemay kana mitikelruwan lra mu, marepadangal lra kana dadawayin da tikelruwan , di adi lra kema'idang hana mucalun (mangayaw). nu ki'a'uway na vangesaran mu, ulra a pidapida na pa'a'alrup pa'aliw 'emalrup tu pu'a'atrar da 'alising kana ma'idangan di ta temuwamuwan.

harem lra kana muvalis lra da kakuwayanan di kinase'er lra inta na Yēncumin, nanta vangesaran di na pararawa lra mu, kemay 2013 'amiyan, pureha lra venasuk kanini na pararawayan di pinukasa lra kana katikelruwanan na mucalun(mangayaw).

i Kasavakan kana ulra ta saya kina'idang na tikelruwan datu ivilin kana palalisiyan nu ka'amiyanan. kana 'ami'ami diya nu ka'amiyanan maruwa puruma' da kaduwaduwan na dinekalranan kurelrang knini na kasaharan, palru harem ini na katikelruwanan karuwa pida lra leman 'ami tu inlrangan.

nata tikelruwan tuy ika'idang, kemay kinapatikeder i lusu mararesan lra kana teruwa kacas da ruma' tu ikaacas, ulra diya na tinatukud.

tuy dinawayan kemay kana ki'uway kikawayan na tinareawac parahan, adi micaheceh mawmau na 'uway tu ivetevet di tu ipatikedir . nahnii tu dinadaway pararahan datu kaacasan na tikelruwan, di tu dinadununan mu, ulra tu pauwayan peniya, tatena' da ma'idang tu ikadalraman datu wadawayan!

ini na muhenan na palralrimawan kemay cakuvan diya na ma'inay, patalram lra pulralrang ki'uway kikawayan i henan. palru harem na ma'inayan diya mu, nu adalrep ta lra kanta 'amiyan mu, adikaadi muruma' kurelrang muhenan ki'uway kikawayan, palru kana piya patikedir kananta tikelruwan, karuwa saliwsan da wariyan, ara kaitayan ta mu, salaw ta musa'ur ! semalra kanta i Kasavakan na ma'inayan pukasa maulep nu katikelruwanan!

我們 Kasavakan 的年祭

我們年祭中的大獵祭習俗,遠在有鞦韆祭之前就已存在,後來演變為以鞦韆祭為主、大獵祭為輔的現象,大獵祭是至今復振大獵祭後,族人才又開始重視的祭儀。

建和的鞦韆慶典,年祭時旅外族人會返鄉參加鞦韆祭,至今也有百年以上歷史。鞦韆高度有三層樓高的主架,還有橫干支架,製作過程,皆以最原始的搭建,每個製作環節都有其特定的工法及意涵! 搭鞦韆的訓練,要從基本的採集開始,搭建鞦韆需要花費一星期的工時,Kasavakan 的男人真的很辛苦。